

Dèklaachon du drèye dè l'òmò

Dèklaachon du drèye dè l'òmò pè tu lu pa.i du mondo

Dèvan kè diyè

Yu kè la rèkonyichinhi dè la dinyitò dè tu luz òmò – tu minbrò dè la méma familyi aouè lu mémò drèye kè nyon pou leû fouiyè – rèprèzintè lò pilyér dè la libartò, dè la justis è dè la pè du mondo,

Yu kè, kin lu drèye dè l'òmò son pò rèkonyu, son mèprijé, on arvè a d'aktò barbaò, rèvòltan pè la konhyinhi dè l'òmò è yu k' on a di d'an fôrta ouè kè tò sò kè l'umanitò atin par dèssu tote, y'é on mondò yeû kè luz òmò saon librò dè prèdjé è dè krè-, débaraché dè leû peur è dè la mizèa,

Yu kè, pè kè l'òmò sussè pò òbledja, én' daryé rèkòrh, dè sè rèvòltò kontra lu ki voudriyan l'èkrazò è lò rèbòché, y'é fran én'pòrtan kè su drèye pouchissan éhè prezarvò pè lò pouvèr dè la justis,

Yu kè y'é fran én'pòrtan d'en'koadjé lò dèvèlòpamin dè rèlachon d'amitcha én'trè lè nachon,

Yu kè, din la Chòrta, lu pouéplò dè lè Nachon Rèunèytè on tòrnò diyè, òte è fôr, leu fouè din lu drèye dè l'òmò, din la dinyitò è lò pri dè la parsa, din l'ègalitò duz òmò è dè lè fènè è yu k' i sè son di prèstò a fè- krèyrè lò prògrè dè la sòssyètò è a betò su pya dè kondichon dè vya pi bouéè è an pi gran libartò,

Yu kè luz Ètate Minbrò sè son én'gadjé aacheûò, man dan la man aouè l'Organizachon dè lè Nachon Rèunèytè, lò rèsپè pè tu lu pa.i du mondò du drèye dè l'òmò è dè lè libartè ki fon parti dè sa nateûa,

Yu kè on komon idé dè slô drèye è libartè è dè la pi òta én'pòrtanhì pè rinplérè konplètamin sè én'gadzemin,

I'Assinblò gènèòla

di, òte è fôr kè la prèzinta Dèklaachon du drèye dè l'òmò pè tu lu pa.i du mondò rèprinzintè on komon idé. I fò kè tu lu pouéplò è tòtè lè nachon arvissan a betò su pya sè idé pè kè tu luz òmò, tu lu rouadzò dè la sòssyètò ky on sla Dèklaachon tòdzò a l'èspri, fachissan l'èfôr, pè l'én'senyamin è l'èdukachon dè fè- krèyrè lò rèsپè dè slô drèye è libartè è d'acheûò, pè dè moujèè d'ôdrè nachenal è én'tèrnachenal ki vaon tòdzò pi aan, la rèkonyichinhi è l'aplikachon pè tu è partote, òche byin pè lè pòpopulachon duz Ètate Minbrò kè pè lu pa.i ki son plaché dèzò leû kmindamin.

Artiklò on

Tu luz òmò vinyon u mondo, librò, tu tòton pè leû dinyitò è leû drèye. Y'on tu d'émò è dè konhyinhi è i dèvon fè- mouhò dè fratèrnitò aouèy luz òtri.

Artiklò du

- 1- Tsakon pou betò én' aan tu lu drèye è tòtè lè libartè én'skrité din sla Dèklaachon, sin fè- dzén' dè diféinhi dè rasse, dè kòleur dè pèl, dè sèxe, dè linva, dè relijyon,d'opinyon pòltekò ou dè tòt òtrò opinyon ki pouri vi- dè la nassionalitò, dè l'òrijina sòssyòla, dè la fòrtena, dè la nèchinhì ou dè nén'pourtè kén't' òtra situachon.
- 2- Én' plus, on faa pò dè diféinhi d'aprè lò statu pòltekò, sè dè la justis, la plahi én'tèrnachenòla du pa.i ou dè l'indrèye dè yeû kè an parsa vén', kè sè pa.i sussè én'dèpindin, soumèye a tutèla, pò librò ou òbledja dè sè plèyé a an limitachon dè su pouvèr.

Artiklò trèye

Tsakon a drèye a la vya, a la libartò è a la protèkchon dè sa parsa.

Artiklò katò

Nyon saa tu- én' èsklavadzò ni fòrcha dè sarvi on mètrè. L'èsklavadzò è lò kòmèrsò duz èsklòvò dè n'en' pourta kén'ta fahon son én'tardi.

Artiklò hén'

Nyon saa soumèye a la tòrteûa, a dè pounichon ou dè trètamin kruèl, én'dinyò ou ki rèbòchon l'òmò.

Artiklò chi

Tsakon a drèye, yeû k'â sussè, a la rèkònyihinhi dè su drèye dèvan la justis.

Artiklò sète

Tsakon é su lò mémò pya dèvan la lòè è a drèye a la méma protèkchon dè la lòè, sin diféinhi. Tsakon a drèye a la méma protèkchon kontra tota parsialitò ki va.i a l'en'kontra dè sla prezinta Dèklaachon è kontra tuz én'koadzemin a sla parsialitò.

Artiklò vout

Tòtè lè parsenè on lò pouvèr dè sè rèvèdrè dèvan lè juridikchon nachenòlè kin leû drèye ki son rèkònyu pè la konstituchon ou pè la lòè son pyateûò.

Artiklò nou

Nyon pou éhè arèhò, én'préjeûò ou tsacha dè son pa.i, sin vretòbla réjon.

Artiklò dji

Tsikè parsa a lò mémò drèye kè lèz òtrè, d'éhè akoutò publikamin pè on tribunal én'dèpindin è én'parsial ki dèssidaa, ou bén' dè su drèye è dè sèz òligachon ou bén' dè la bouéa réjon dè l'akuzachon mandò kontra lyi pè an pounichon.

Artiklò onhè

- 1- Tòta parsa akouzò pè an mòvèji akchon réstè inòchinta tin kè sa fòta dèvan la lòè a pò éhò prouvo pindin on pròssè publik yeû kè tòtè lè gaanti pè sa dèfinsa lyi on éhò akòrdò.
- 2- Nyon saa kondanò pè d'akchon ou dè mankamin ky on éhò kòmèye a on moumin yeû ky évè pò én'tardi pè lè lòè nachenòlè ou én'tèrnachenòlè. Dè la méma fahon, on poura pò balyé an pounichon pi fòrta kè la ky évè prèyussa u moumin dè la fòta.

Artiklò dòhè

Y'é dèfindu d'alò betò lò nò din la vya parsenèla dè lè dzin, din leû familyi, leû baraka, lè lètrè ki mandon ou rèchèyvon. Y'é dèfindu dè betò bò leû òneur è leû reputachon. Tsikè parsea a lò drèye a la protèkchon dè la lòdrèye dèvan dè paèlyèz atakè.

Artiklò trèhè

- 1- Tsikè parsea a lò drèye dè sirkulò libramin è dè pouchèr rèsò yeû kè le vou én' dedin d'on étate.
- 2- Tsikè parsea a lò drèye dè s'en' mòdò d'on pa.i, mémò du sén' è lò drèye dèz i tòrnò.

Artiklò katouhè

- 1- Én' kasse dè parsékuchon, tòta parsea a lò drèye d'alò tsartché rerefujò è dè pouchèr éhè akoulyèyta, din d'òtri pa.i.
- 2- On pou pò akòrdò sè drèye a kortchon ky é pòrchuvu pè on krimò òtrò kè pòltekò ou pè d'aktò kontrèò a lè dirèkchon è uz idé dè lè Nachon Réunèytè.

Artiklò tchinhè

- 1- Tsakon a drèye a an nachenâlitò.
- 2- On pou pò fouiyè a kortchon sa nachenâlitò pò dèpli kè son drèye a n'in tsandjé.

Artiklò sèhè

- 1- Kin i son én' adzò, l'òmò è la fèna dè n'en'pourta kén'ta rasse, nachenâlitò ou reliyon, on lò drèye dè sè maryò è dè fondò an familyi. Tu du on lu mémò drèye dèvan lò mariédzò, pindin k'i son maryò è én' kasse dè divòrsò.
- 2- Lò mariédzò pou éhè foua slamin aouè l'akòr librò è én'tchér du futur maryò.
- 3- La familyi é nateûèlamin lò pilyér dè la sòssyètò, l'a drèye a la protèkchon dè la sòssiètò è dè l'Etate.

Artiklò disète

- 1- Tòta parsea, òche byin sòlèta kè én' kòlèktivitò, a drèye a la pròpriétò.
- 2- On pou pò sin réjon prindre la pròpriétò dè kortchon.

Artiklò dijvoute

Tòta parsea a drèye a la libartò dè pinché, dè konhyinhi è dè reliyon ; i vou diyè kè on a lò drèye dè tsandjé dè reliyon ou d'idé, dè diyè sa reliyon ou suz idé publikamin ou én'trè sè, pè l'en'senyamin, la prateka, din tòtè lè sérémòni a l'èglijji ou tché sè.

Artiklò dijnou

Tsakon a lò drèye a la libartò d'avèr son opinion è dè lò diyè. I supouzè k'on a lò drèye dè pò éhè én'kyétò pè suz idé, k'on a lò drèye dè tsartché, dè rèchèyvrè è dè mandò, sin s'òkupò dè lè frontché-, lèz én'fòrmachon è luz idé pè tu lu móayin.

Artiklò vin

- 1- Tòta parsea a lò drèye dè s'assòssiyé aouè d'òtrè pè dè bouéè tsouzè.
- 2- Nyon pou éhè obledja dè sè betò din an assossiachon.

Artiklò vintchon

- 1- Tsikè parsea a lò drèye dè diyè son mòte din la dirèkchon dè la vya dè son pa.i, k'i sussè dirèktamin ou pè la ouè dè lu ky on éhò libramin dèzinyé.
- 2- Tòta parsea a lò drèye dè s'òkupò dè lè fonkchon peblekè dè son pa.i, din dè kondichon d'égalitò.
- 3- L'òtoritò du pouvèr publik é chadoua su la volontò du pouéplò. Sla volontò dèye sè diyè pè d'èlèkchon ònéhè ki dèvon sè ti-pèryòdikamin u vôte sègrète ou d'an fahon ki gaantèychè la libartò du vôte. Tò lò mondò pou vôtò.

Artiklò vint è du

Tòta parsa, én' tin kè minbrò dè la sòssyètò, a drèye a la sèkuritò sòssyòla ; le pou prètindrè a an via konvinyòbla, a pouchèr ti- sa plahi din la sòssyètò, a pouchèr sè kultivò, én' parsa dinyi, a l'èspri uvér è kapòblò dè s'en'retsi. Tò sin aouè la kontribuchon dè l'èfòr nachenal è dè la kòòpéachon én'tèrnachenòla, én' tinyin kontchò dè l'organizachon è dè lè rèsorsè dè tsikè pa. i.

Artiklò vint è trèye

1. Tòta parsa a drèye a l'ouvra, le dèye pouchèr chòèzi libramin son ouvra, din dè kondichon justè è konvinyòblè. Le dèye éhè parò kontra lò tsômadzò.
2. Pè la méma ouvra, tò lò mondò a drèye a la méma pâyi, sin diféinhi.
3. Sè ki travalyè a lò drèye d'éhè payé d'an fahon justa è konvinyòbla pè pouchèr vivrè, lui è sa familyi, an via konfòrma a la dinyitò dè l'òmò. Én' kasse dè bèzoin, a dèye pouchèr kontò su luz òtri mòayin dè protèkchon sòssyòla.
4. Tòta parsa a lò drèye dè sè groupò aouè d'òtri pè betò su pya on sindikate pè dèfindrè suz én'téè.

Artiklò vint è katò

Tòta parsa a drèye u rèpou è a lè distrakchon. Lò tin dè l'ouvra dèye éhè limitò réjeûòblamin è dèye lòché plahi a dè kondjé payé régulyé.

Artiklò vin hén'

1. Tòta parsa a drèye a an via konvinyòbla pè acheûò sa santé, pè éhè a l'èjo, lyi è sa familyi, d'abôr pè la noreteûa, l'arbilyemin, lò lòdzemin, lò medzòhén' è lè droguè pè sè sonyé è pè lu sarvechò dè la kòlèktivitò kin le n'a fòta. Lâ drèye a la sèkuritò én' kasse dè tsômadzò, dè maladi, d'én'validitò, dè vèvò, dè vyèyès ou alôr, din tu lu kasse dè pérta dè su mòayin dè vivrè a la suita d'avarô én'dèpindin dè sa volontò.
2. La matèrnitò è lò dzevéò adzò on drèye a éhè spéssiolamin èydò. Tu luz èfan, k'i sussan vu u mondo din ou én' dèfour du mariédzò dèvon pròfitò dè la méma protèkchon sòssyòla.

Artiklò vint è chi

1. Tòta parsa a drèye a l'èdukachon. L'èdukachon dèye ryin kòhò du moin pè l'èkoula tak u sartifikate. Y'é obledja dè balyé l'én'strukchon a tu luz èfan. L'én'sènyamin tèknik è pròfècheûèl dèye éhè jènèralizò ;lu granz ètudzò dèvon éhè uvér, d'ègòla fahon, a tu lu ki l'on mretò.
2. L'èdukachon dèye tsartché lò dèvèlopamin konplèt dè la parsenalitò dè l'òmò è dè lè libartè ki son lè fondachon dè la sòssyètò. Le dèye èydò la konpréinchon, la toléanhì è l'amitcha entrè lè nachon, lè rassemblage, lè relijyon è tòton pè lò dèvèlopamin du travô dè lè Nachon Réunèytè, pè manti- la pè.
3. Lu pa.in son lu premyé a avèr lò drèye dè chòèzi la sôrta d'èdukachon k'i voulion pè leûz èfan.

Artiklò vint è sèt

1. Tòta parsa a lò drèye dè s'òkupò dè la via dè l'èspri din sa kòmunôtò, dè prindrè son plèji aouè lè bélè tsouzè è dè partissipò u prògrè dè la syanhi è a sò kè l'apourtè dè bon.
2. Luz èkrivin, luz artist, luz òmò dè syanhi ki pròduyon an ouvra on lò drèye d'avèr la protèkchon pè leûz én'téè matèryèl è pè sò ki leû rèvén' mòròlamin.

Artiklò vint è vout

Tsikè parsa a drèye a s ky ussè, su lò plan sòssyal è én'tèrnachenal, l'ôdrè pè kè lu drèye è lè libartè én'skri din sla prezinta Dèklaachon pouchissan tròvò leû plin èfè.

Artiklò vint è nou

1. L'òmò a dè dèvèr dèvan la komunòtò yeû kè lò dèvèlòpamin librò è én'tchér dè sa parsenalitò é pòcheblò.
2. Kin a fè valyèr su drèye è kin a pròfitè dè sè libartè, tsakon dèye slamin sè plèyé a lè limitachon prèyussè pè la lòè, justò pèacheûò la rèkonyichinhi è lò rèsplè du drèye è dè lè libartè duz ôtri è pè rèspondrè a sò kè demandè la mòròla, l'ôdrè publik è an bouéa vya pè tu, din an sòssyètò gòvarnò pè lò pouéplò.
3. Slô drèye è slè libartè pouron jamè s'ègzarsò d'an fahon kontrèa uz idé è a lè ryéglè dè lè Nachon Rèunèytè.

Artiklò trinta

Pò an sòla dispòzichon dè la prèzinta Dèklaachon pou sarvi a ôtòrizò on Ètate, on groupamin ou an parselna, a dèstruiyè lu drèye è lè libartè kiz i son én'skri.

Tradukchon : Anne-Marie Bimet

patois d'Hauteville-Gondon – vallée de la Tarentaise - Savoie